

**NATIONAL ASSEMBLY OF
SEYCHELLES**

Tuesday 16th February, 2021

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour tou bann Manm Onorab. Bonzour tou piblik a lekout e byenveni pou nou sesyon ozordi. Enn ki'n, mon konnen i byen atande, en moman ki bokou nou piblik i espere e i enkli osi bokou nou bann sitwayen ki an deor Sesel.

Nou pou annan ozordi avek nou Minis Finans e son delegasyon. Nou annan plezir akeyir Minis Naadir Hassan Minis pou Finans Plan Ekonomik e Komers. E avek li dan son delegasyon i annan Sekreter D'Eta Patrick Payet e Sekreter Prensipal Damien Thesee.

E zot isi pou prezantasyon ladres Bidze par Minis. Mon ava envit *Leader* Biznes Gouvernman pou demann *Second Reading of the Appropriations Bill* silvouple.

HON BERNARD GEORGES

Mersi Mr Speaker. Bonzour Mr Speaker. Bonzour Minis e ou delegasyon bonzour tou bann Manm Onorab. E bonzour tou bann dimoun ki pe ekout nou dan lakour.

Mr Speaker anba *Order 69(2)* mon *move* ki *Appropriation Bill 2021* i ganny lir en Dezyenm Fwa. Mersi.

MR SPEAKER

Mersi. Eski Mosyon i a ganny segonde? Onorab Arissol.

HON SANDY ARISSOL

Mersi Mr Speaker. Bonzour Mr Speaker. Bonzour Minis ek ou delegasyon. Bonzour tou Manm e tou nou bann frer ek ser deor ki pe ekout nou.

Mr Speaker set avek gran plezir ki mon segonn Mosyon propoze anmennen par Onorab Georges. Mersi.

MR SPEAKER

Mersi. Nou ava envit Minis pou prezant ladres lo *Appropriations Bills*. Minis.

MINISTER NAADIR HASSAN

Mr Speaker,
Onorab *Leader*
Lopozisyon,
Onorab *Leader* pou zafer
Gouvernman,
Bann Manm Onorab,

Ser e frer, pep Seselwa bonzour.

1. Lentrodiksyon

Mr Speaker ozordi mon pe delivre en premye ladres Bidze anba sa nouvo ladministrasyon. Annefe sa i osi mon premye diskour Bidze koman Minis pour Finans, Planifikasyon Ekonomik ek Komers.

I bon note ki sa nouvo Gouvernman in pran sarz sa pei dan enn son moman pli difisil dan son listwar. Me kantmenm sa nou determinen e mon asire ki nou pei pou sirviv tou sa bann defi. Me nou pa pou zis sirviv, me osi pozisyonn li dan en pli bon fason pou relanse e prospere.

Anliny avek sa, Bidze 2021 pou dan bann premye plan pou Gouvernman pou sa lannen e bann lannen ki vini. Premyerman i pou donn detay bann aksyon ki in pran e ki i pou pran pou asire ki nou stabiliz sityasyon finansyel pei e asir soustenabilite nou det.

Sa bann mezir pou osi ede pou anmenn en pli bon zesyon resours nou pei atraver bon gouvernans. Dezyenmman sa Bidze pou met devan bann nouvo Polisi sa Gouvernman, pou relans nou lekonomi ki'n

ganny met lo son zenou avek kriz koze par pandemik COVID-19.

Nou lanbisyon se enn pou anmenn en transformasyon konpreansiv e solid, pou kree larises pour nou pep e pour nou pei. Mr Speaker Prezidan dan son ladres lo Leta nou Nasyon, i en lapros fran e ferm. In fer nou realize ki defi ki nou pei i ladan avek sa pandemik COVID-19. E pli enportan, konvenk nou tou ki lafason ki nou pei in ganny zere oparavan i enn ki nou bezwen diskontinyen enn fwa pour tou.

Depandans lo Sekter Tourizm ki nou bezwen admet ki nou annan en gran lavantaz ladan, anvi ki labondans nou labote natirel in ozordi lo son zenou. Nou bezwen alors redinamiz nou zefor pou relev e restriktir nou fason fer keksoz.

Nou bezwen met tou nou lentelizans e *think outside the box*, parey Angle i dir, *smart thinking*. Sa pep i ranpli ek bann zonm e fanm profesyonnel s nou pe demann zot pou zwenn nou dan sa latras pou sov nou pei. Sesel alors pou bezwen pas dan en seri reform transformasyon makroekonomik, striktirel e gouvernans.

Ki pou permet re kree larises asir devlopman

ekonomik e promouvwar e enstil dan nou pep lenportans, pran responsabilite pou nou prop lekor. I enportan pou realize ki annan pandemik COVID-19 oubyen non, sa pei pa ti pou kapab kontinyen al parey i ti pe ale.

I nesese alor ki nou lev laspirasyon sa pep pour ki nou reganny nou valer moral, prodiktiv, inovativ e responsabilite ki nou ti deza annan.

Mr Speaker sa pandemik COVID-19 in vin koman en *wakeup call* pou nou tou. Pandan lannen 2021 Minister Lasante pou kontinyen diriz sa batay difisil kont sa pandemik, i pou entansifye zefor pou donn vaksen tou nou popilasyon ki vin devan pou pran vaksen. Anfen ki nou pei i ava kapab ariv lo sa nivo imilite kolektiv ki nou bezwen. Sa i lakle, si nou anvi retourn ver en lavi plizoumwenn normal pandan sa lannen.

Sa ki pli enportan se ki pou nou gard antet ki dan moman pli difisil kot nou rezilyans koman en pei ek en Nasyon, i ganny teste. Se la osi moman pou nou dekouver nouvo loportinite.

Mr Speaker i annan en dikton ki dir; "Dan tou moman difisil i annan loportinite." Nou

devret annan sa fleksibilite pou sorti dan nou *comfort zone*, e gete kwa nouvo ki nou kapab fer. Dan moman difisil nou kapab dekouver nouvo *skills* ki nou pa'n zanmen konnen nou ti annan, akoz nou ti dan en *zone* konfor.

La i le moman pou nou re envant nou lekor e nou pei. Se sa vizyon sa nouvo Gouvernman. Batir en Nasyon ek en pei ki annan rezilyans kont tou defi ki prezant devan li, ki ler i tonbe i kapab leve pli for ankor. Kot son pep i annan linisyativ e pran tou loportinite ki a dispozisyon. Kot nou lekonomi i ganny transformen e nou pa zanmen met tou nou dizef dan en sel pannyen.

Sa Gouvernman i oule en pei kot ler lemonn i eterne, menm si nou kapab santi sa sekous, nou osi nou'n pare pou fer fas kont nenport ki evantyalite. E pli enportan ki nou tou nou kapab sirviv.

2. Revi lo performans ekonomik global

Mr Speaker krwasans global pou lannen 2020 i ekspekte kontrakte par 4 a 5 poursan dapre bann piblikasyon resan, bann diferan lorganizasyon e lenstitisyon

ekonomik global tel parey Labank Mondyal *OECD*.

Piblikasyon *World Economic Outlook* an Oktob 2020, i dekrir ekonomi global koman enn ki ankor pe esey eleve dan sa profonder ki in tonm ladan, koze par bann restriksyon mazer ki ti ganny mete an komansman Avril 2020.

Fon Monnetter Enternasyonal i prevwar en kontraksyon global 3.5 poursan pou lannen 2020. Sa i 0.9poursan pli o ki ti'n ganny estimen, an vi ki nou annan pli gro mouvman dan aktivite ekonomik global. Sirtou dan dezyenm parti lannen 2020.

Parkont se selman Lasin ki'n vwar en krwasans pozitiv a 2.3poursan pou lannen 2020. Evalyasyon ekonomik Fon Monnetter Enternasyonal i dir ki pou lannen 2021 pou annan en amelyorasyon dan krwasans global konpare avek 2020.

Pou lannen 2021 Fon Monnetter Enternasyonal i ekspekte lekonomi global i agrandi par 5.5poursan e par 4.2poursan an 2022. Menm si i ankor annan bokou lensertitid, sa lekspektasyon i atribye avek bann konpanyan vaksinasyon ki pe ganny fer e osi bann diferan Polisi makro fiskal e sosyal ki

bann pei pou bezwen met an plas.

Sa pour fer ki bann aktivite ekonomik pou kapab rebran dan milye lannen. I bon note osi ki malgre bann diferan vaksen ki pe ganny fer, ki donn lemond lespwar ki nou kapab ranvers nou sityasyon aktyel, bann nouvo varyan sa viris e bann *lockdown* ki pe ganny enpoze dan plizyer pei, i touzour ganny en konsern pou bann prediksyon krwasans.

3. Bilan Performans ekonomik e fiskal 2020 Sesel

Mr Speaker lefe sa pandemik *COVID-19* lo lekonomi Sesel pou lannen 2020, i enn pli pir ki nou'n deza eksperyans. **Mon repete i enn pli pir ki nou'n deza eksperyans.** Avek lamannman Bidze 2020, nou ti pe ekspekte ki nou lekonomi i kontrakte par 10.8poursan. Parkont kontraksyon nou lekonomi in deteryore plis ankor pou ariv 13.5poursan.

Sa i akoz en rediksyon kontansyel ki nou eksperyans dan Sekter Tourizm an vi ki kantite touris ki'n vin isi apre louvertir nou lafrontyer an Out 2020, pa'n ogmant par sa kantite ki nou ti'n prevwar. Dernyen sif i montre ki larive

touris ti redir par 70.1poursan konpare avek lannen 2019, pou sorti 384, 204mil viziter pou li ariv zis 114, 858mil viziter.

Nou estimen ki Sekter Lakomodasyon e Manze e osi Sekter Administrativ in kontrakte par 65poursan. Sekter Transportasyon e stokaz i osi relye avek Sekter Tourizm atraver bann vol larive bann bato e in estimen pou kontrakte par 30poursan.

Avek en tel performans dan nou Sekter Tourizm koleksyon reveni avek sa sekter in redwir par apepre \$322milyon Ameriken. Sa i reprezant en bes 61.3poursan konpare avek sif provizyonnel pou lannen 2019.

Menm performans pe osi ganny obzerve dan koleksyon lo taks valer azoute (VAT) lo kote domestik dan Sekter Tourizm, avek en bes 48.2poursan ki ekivalan R416milyon a lafen lannen 2020.

In osi annan en bes dan aktivite konstriksiyon ki fer ki pou annan en kontraksiyon 1poursan dan sa sekter pou lannen 2020. Dan Sekter Litilite Delo, Elektrisite nou'n osi obzerv en rediksiyon 1poursan dan rediksiyon pandan lannen 2020.

In annan en rediksiyon 15poursan dan krwasans dan

Sekter Distribisyon e *Retail*, e dan Sekter Lar, Rekreasyon e Lwazir in annan en bes 35poursan dan krwasans. E lot kote malgre lefe advers dan sa bann sekter, nou'n vwar en krwasans pozitiv dan serten lezot sekter.

Dan Sekter Prodiksiyon Manze nou'n obzerv en krwasans 17.55poursan, e dan Sekter Lenformasyon e Telekomunikasyon en krwasans 13.95poursan. Sekter Finansyel e Lasirans in osi annan son krwasans 9.4poursan. Sekter lapas in osi rikord en krwasans 2.20poursan. Me in annan en krwasans minim dan Sekter Lagrikiltir par 0.15poursan.

Mr Speaker lo kote nou performans fiskal, in pli pir konpare avek sityasyon ekonomik pei avan ki nou ti menm anbark dan reform makro ekonomi an 2008. Pou lannen 2020 nou'n alors *attend* en defisit fiskal primer, preliminar 15poursan ouswa R3.231bilyon e en *overall deficit* 18poursan ki reprezant R3.871bilyon.

Sa i vedir ki reveni ki Gouvernman ti bezwen pou finans depans ki ti'n ganny planifye, pa ti ase. Gouvernman in bezwen finans sa ladiferans

par pret larzan pou en lavalè R3.871bilyon.

Mr Speaker sa i pa en sityasyon ki soutenab, alòrs Gouvènman pou bezwen pandan sa bann lannen ki pou vini revwar lafason ki i zer son depans pou asire ki nou vin pli rezilyans a bann defi ki nou pe eksperyanse an se moman.

Sa nouvo depans in ganny fer dan lannen 2020, in fer ki menm si lekonomi pa ti pe prodwi sitan aktivite ekonomik, nou'n kontinyen depanse dan en fason artifisyel. Sa i enn bann rezon prensipal akòz nou to lesanz in deprese e kou lavi in ogmante.

En legzanp, se avek lentrodiksyon *FA4JR* ki pa'n ganny enplimante lo en baz merit e sa in ede pou anpese ki pei i aziste avek son nouvo sityasyon ekonomik.

4. Bidze 2021

Mr Speaker pou Bidze 2020 en sonm R9.292bilyon ti ganny aprouve par Lasanble Nasyonal an 2019, e lamannman Bidze 2020 Gouvènman ti propoz en nouvo Bidze pou en sonm R10.447bilyon.

Sa ti en logmantasyon R1.2bilyon. En sonm R1.139bilyon ti osi ganny

aprouve koman en Bidze Siplemanter an Desanm 2020 pou lannen 2020, ki fer total Bidze aprouve pou 2020 ti R11.586bilyon.

Pou lannen fiskal 2021, nou pe alòrs propoz depans R11, 013, 648, 296.00 Nou pe prevwar kolekte R8.260bilyon koman reveni ek bann don. Sa i fer ki nou pou annan ankòr en defisit primer fiskal pou en sonm R2.642bilyon ouswa ekivalan 11.8poursan nou *GDP*. E en total defisit 15.3poursan nou *GDP*.

Sa i vèdir ki Gouvènman pou bezwen pret 3.417bilyon pou kapab finans bann depans. Mr Speaker mon rekonnèt ki depans Gouvènman i reste o pou lannen 2021, ler nou konsider nou sityasyon kritik ki nou ladan.

Rezon prensipal se akòz depresyasyon nou Roupè par plis ki 30poursan, ki'n annan en lenpak direk lo nou bann depans ki nou fer an deviz etranzer;- tel koman bann depans lo lenportasyon latizann, lekipman medikal, bann proze kapital e lezot bann byen ek servis ki Gouvènman i fer.

Dezyenman in osi annan bann proze lenfrastriktir ki nou anvizaze i ganny finans par bann don, e bann *loan*. En

lavaler R1.185bilyon dan bann proze, pou ganny finanse par bann don, e lavaler R316.5milyon par bann diferan *loan*.

I bon note ki nou bann depans lo proze kapital in ganny prioritize, pou permet selman bann proze ki'n fini komanse e bann ki kritik pou pei materyalize. Mr Speaker nou plan mwayen term se pou redwir sa defisit pou vin 8poursan an 2022 e 2poursan an 2023.

En tel rediksyon i a permet nou retourn lo en semen soutenab dan sa prosen 5an. Pou redwir sa defisit nou pou bezwen kontinyelman redwir bann depans *recurrent* ki Gouvernman i fer. E asire ki Gouvernman pe fonksyonn lo en baz pli efektiv e kot gaspiyaz e diplikasyon i redwir.

Parkont pou lannen 2021, Gouvernman in redwir depans pou aret *Scheme FA4JR* apartir Avril sa lannen, ki koup R1.082bilyon lo Bidze. Redwir depans lo *welfare* par R47.58milyon e redwir *URS* par R24.689milyon konpare avek Bidze 2020.

Sa legzersis redwir depans pou kontinyen e i pou reflekte dan *mid-year review* e osi Bidze pou bann prosen lannen. I bon note ki sa plan pou redwir

defisit i osi depandan lo en amelyorasyon dan sityasyon *COVID-19* dan lemond, e a ki vites bann diferan lekonomi i rebran.

4.1 Det pei

Mr Speaker nesese pou redwir nou defisit fiskal i enportan an vi ki det Gouvernman i nepli soutenab. Nou ava rapel ki langazman ti'n ganny fer sete pou *attend* en target 50poursan det *AGDP* par lannen 2021.

Malerezman ler mon ti aksepte lapel Prezidan Ramkalawan pou pran sarz Minister Finans a lafen 2020, nou det *a GDP* ti 99.4poursan. Bes dan nou prodiksyon domestik brit e bann diferan *loan* e garanti ki Gouvernman in pran an plis, in kontribye dan deteryorasyon dan nou det-*a-GDP*.

A lafen lannen 2020 nou total stok det ti R18.08bilyon, ladan R9.06bilyon i det eksteryer ki ekivalan 50.1poursan total det. E R9.02bilyon i det domestik.

Det eksteryer in ogmant par R3.5bilyon konpare avek lafen 2019 e det domestik in osi ogmante par R1.9bilyon konpare avek lannen lafen lannen 2019.

Dan sa R18.08bilyon ki Gouvernman i dwa, 94.6poursan i det direk Gouvernman e larestan i bann *loan* ki Gouvernman in garanti.

A lafen lannen 2021, nou ekspekte ki nou det-*a-GDP* i ariv 108.4poursan, e a lannen 2025 87.2poursan, si nou kontinyen lo menm larout avek en Bidze ki pli soutenab. Sa diskisyon lo soustenabilite nou det, pe ganny fer dan konteks nou negosyasyon ek *IMF* pou en program reform.

4.2 Rezerv pei e Sekter Monneter

Lo en baz *gross*, rezerv ofisyel ki ti \$580milyon a lafen 2019, in desann pou ariv \$559milyon a lafen 2020. E in ariv \$535milyon ziska le 12 Fevriye 2021.

Sa rediksyon i relye avek sonm ki'n ganny servi pou fer sir ki pei i onor son lobligasyon enternasyonal pou pey det pei, e osi pou asiste depans lo marse, prensipalman pou ed *SEYPEC* e *STC*. E osi demann sorti kot bann Labank Komersyal.

Sa ki konsern bann *deposit* rezidan an deviz etranzer kot nou bann labank domestik, sa in redwir sorti \$565milyon an Desann 2019,

pou ariv \$546milyon an Desann 2020.

Nou to deviz etranzer, in depresye kont tou lezot lesanz ki Sesel i fer tranzaksyon avek. Bes dan valer nou Roupi in sorti an mwayenn R14.3sou an 2019 pou ariv R19.62sou an 2020 oubyen par 26poursan.

Pou Zanvye 2021, Roupi ti pe esanz pou R21.50sou par Dolar Ameriken. Avek rediksyon dan aktivite ekonomik e degre lensertitid ki i annan, *demand and supply* pou kredi in ganny severman afekte.

Rezilta preliminar i montre ki in annan zis en lagrandisman 5.1poursan dan bann *loan* an Roupi, ki ganny donnen avek sekter prive an 2020, konpare a 17.2poursan an 2019.

Lo kote to lentere, in annan en rediksyon ki'n ganny obzerve an 2020, kot an mwayenn *lending rate* in desann sorti 12.36 poursan an 2019 pour vin 10.94poursan an 2020.

To lentere lo *savings* in sorti 2.88poursan pou ariv 2.19poursan dan sa menm peryod.

4.3 Konteks lekonomi pour 2021

Mr Speaker pou lannen 2021, nou pe ekspekte en amelyorasyon modere dan nou lekonomi. Nou pe prevwar en krwasans domestik brit 2.08poursan.

Sa i fer ki nou prodiksyon domestik brit ki nou'n prevwar, pou R22.3bilyon konpare avek R20.6bilyon pou lannen 2020. Dan Sekter Tourizm ki nou pilye lekonomi apartir dezyenm kar lannen 2021, avek bann program vaksinasyon ki pe ganny fer par bann diferan pei otour lemond, espesyalman dan bann pei kot nou ganny plis touris, nou pe prevwar en pti amelyorasyon par 0.95poursan dan sa sekter.

Nou pe ekspekte pli gran krwasans dan sekter lenformasyon e telekominikasyon par 5.23poursan e dan sekter prodiksyon manze par 4.95poursan. Sa i akòz demann kontinyel parmi popilasyon ki menm. E nou pe osi prevwar en ogmantasyon dan demann anmezir ki viziter i komans retounen.

Dan sekter lagrikiltir ek lapas, nou ekspekte ki sa de sekter i vwar en amelyorasyon an 2021 par 2.32poursan. E 1poursan restriktivman. Ankor an mezir ki nou lekonomi i rekipere gradyelman.

Restriktirasyon mouvman dan pei i ganny retire, e osi restriksyon ki annan dan nou bann marse kle pou tourizm. Avek sa, dan mwayen term nou ekspekte ki nou lekonomi i relanse gradyelman avek en krwasans 3.5poursan pou lannen 2022 e 2023.

An zeneral nou pe prozekte en to lenflasyon 3.78poursan, an vi presyon lo demann pou deviz etranzer, ki mem si i pe stabilize, lefe i reste ki nou depann bokou lo lenportasyon e sa i lenfliyan pri komodite.

4.4 Koleksyon taks

Mr Speaker nou ekspekte kolekte R6.17bilyon an 2021 dan koleksyon taks, ekivalan 27.6poursan nou *GDP*. Prozeksyon nou 4 pli gro taks ki nou kolekte i *comme swivan*; nou ekspekte kolekte R1.1bilyon dan taks lo biznes pou lannen 2021, an vi bann pert dan lannen 2020 ki pou ganny anmennen dan lannen 2021.

Sa i en rediksyon R81.1milyon oubyen 7.7poursan konpare avek lannen 2020. Menm si nou ekspekte en amelyorasyon dan nou lekonomi, performans bann biznes pou lannen 2021 i

petet enn ki pou pran bokou letan pou li relanse.

E se selman avek larive tourizm ki nou pou vwar pli gran amelyorasyon dan sa laliny taks an mwayen term. Dan koleksyon *income tax* nou osi ekspekte en rediksyon, an vi bann biznes prove pou bezwen fer lo zot biznes. E an vi ki lo kote Gouvernman, pou napa logmantasyon dan saler e lenplimantasyon nouvo *Scheme*.

Lo kote taks valer azoute (VAT) nou ekspekte kolekte R2.14bilyon ki reprezant 35poursan dan tou taks ki nou kolekte, sa i en logmantasyon 2poursan ouswa R48.9milyon, konpare avek koleksyon 2020. Sa prozeksyon i enn modere, an vi nou ekspekte en amelyorasyon modere dan nou lekonomi pou 2021.

Dan mwayen term, taks lo valer azoute pou agrandi anliny avek lagrandisman dan nou krwasans domestik brit.

Nou pe fer en prozeksyon R1.28bilyon dan koleksyon *excise tax* pou lannen 2021. Lenportasyon karbiran i pli gran kontribiter dan sa laliny taks an vi ki sanzman dan pri sa komodite, i zeneralman pa annan en gran lefe dan son demann.

Sa i reprezant en logmantasyon R21.6milyon konpare avek lannen 2020, an vi lekspektasyon ki aktivite ekonomik i ekspekte rebran apartir milye sa lannen.

5. Konteks Bidze 2021

Alors Mr Speaker, pour sa Bidze 2021, nou priyorite se pour

(a) Premyerman, anmenn Bidze Gouvernman lo en baz pli soutenab par: -

Redwir defisit fiskal e fer en tranzisyon gradyelman ver en Bidze ki fer en sirplis ki ava ede anmenn det Gouvernman a en nivo soutenab.

Pou fer sa nou pou bezwen:

i) Redwir bann depans Gouvernman.

ii) Retir labi ek koripsyon dan Gouvernman e

iii) Retir depandans lo lasistans sosyal pour bann endividi ki kapab travay.

(b) Dezyenmman nou pou met an plas bann Polisi pou relans nou lekonomi dan

(i) Sekter Tourizm,

(ii) Sekter Lapes,

(ii) Sekter Lagrikiltir,

(iv) Sekter Finansyel

(v) Sekter *Digital*

Economy.

5.1. Retir labi e aksyon koripsyon

Mr Speaker, i priyorite sa Gouvernman pou retir tou labi e aksyon koripsyon ki annan dan zesyon finans piblik sa pei, e met an plas bann program ki pou baze lo merit e ki pou kree larises e anpes lapovrete.

Pour bokou lannen Gouvernman pa'n pratik bonn governans dan son administrasyon. In soutir bann zesyon ki pa onnet anver larzan piblik e pa'n asire ki in annan rann kont dan fason ki Bidze, bann antite ki depan lo en Bidze i ganny zere.

Nou bezwen asire ki larzan i asiste, bann ki merite ouswa delivre bann program e proze ki la popilasyon i byen bezwen.

5.1.2 Redwir sa defisit fiskal ki nou'n eksperyans an 2020 gradyelman pandan sa 3 lannen ki vini.

Mr Speaker, nou defisit bidzeter, i bezwen ganny redwir gradyelman e dan en fason organize, ki ava permet ki an mezir ki nou fer bann reform makro ekonomik e redwir depans Gouvernman e retir gaspiyaz e bann pratik

koripsyon, sa defisit i ava vin pli soutenab.

5.1.3 Retir depandans lo lasistans sosyal pour bann endividi ki kapab travay

Gouvernman pou met an plas bann striktir, pou protez bann ki pli vilnerab, e fer bann stratezi pou diriz dimoun dan lanplwa, avek bi pou redwir lakantite etranze ki ganny anploye dan pei.

Sa i espesyalman dan bann pozisyon ki definitivman kapab ganny fer par en Seselwa. Pour tro bokou letan, in annan labi dan lasistans sosyal, kot in ariv en staz kot sa ki vremen bezwen en sipor pa pe gannyen. Me bann ki pa bezwen, ki kapab leve e al travay, pe benefisyé.

Mr Speaker, sa kalite labi pou bezwen dezormen bezwen arete. Tou dimoun ki kapab travay i devret pe travay. Pou napa okenn leksepsyon pour okenn dimoun. Nou tou nou devret pe travay pou sonny nou fanmir, e pa depan lo Leta.

Nou devret annan en lafyerte pou travay, zis parey nou Prezidan ti fer resorti dan

son Ladres lo Leta Lanasyon, an Zanvye.

Sa valer travay, e travay dir, ki nou bann granparan ti annan i devret rekonmans bourzonnen dan nou zenerasyon ozordi. A lafen dizour, nou tou nou devret pe kontribye dan nou pei.

5.2 Labaz depans Gouvernman

5.3.1 Saler

Mr Speaker, en Bidze R2.96bilyon pe ganny propoze pour saler pour lannen 2021. Sa i konpare avek R2.67bilyon ki'n ganny depanse an 2020. Sa i fer ki nou annan en *ratio* 13.24 poursan saler a nou *GDP*.

Nou depans lo saler i kontinyelman ogmante e sa i demontre ki mannyer Gouvernman in re-grosi, konpare avek bi reform ekonomik an 2008. Ki enn son bi sete zisteman, redwir groser Gouvernman.

Alor avek defi bidzeter, pour lannen 2021, Gouvernman in selman finans rekritman bann pozisyon kle dan serten Minister e Lazans. Pou osi napa logmantasyon saler bann travayer servis

piblik, e logmantasyon dan alawenns pour *long service*.

Dan menm loptik, Gouvernman pa pou finans okenn nouvo *Scheme* saler, pour sa lannen prenon kont nou bann defi ekonomik.

En premye seri restriktirasyon in osi ganny anonse par Prezidan Ramkalawan. Avek revi Bidze milye lannen, nou pou'n kapab konsolid sa bann seri restriktirasyon ki pe ganny travay lo la, pou asire ki nou annan an plas en ladministrasyon piblik ki pli efikas, par redwir lakantite diplikasyon ki annan, e osi redwir lo bann pozisyon ki pa neser, ouswa pa pe performen.

Pour lenstan, ziska ler sa bann lamannman Lalwa, sa bann antite i ganny konplete, laplipar bann Bidze ki pe ganny propoze i dan son totalite.

5.3.2. Byen e Servis

Mr Speaker, Bidze byen e Servis dan Gouvernman, i osi enn ki tre gro, avek en provizyon R3.085bilyon ki'n ganny fer. **Pour lannen 2021, i pou enn mon priyorite pour revwar nou *Public Procurement Act*.**

An vi bann diferan konplent ki egziste lo sa size *Procurement*, Gouvernman pou revwar lafason ki nou fer prokirman, avek bi senplifye prosedir.

Me an menm tan, tou bann Minister e Departman pou bezwen zwe zot rol pli byen, par pran en pli gran lentere pou asire ki zot swiv en prosedir prokirman ki transparan, me senplifye.

Dezyenmman, pou osi annan bann mezir ki pou ganny pran avek bann kontrakter ki kontinyelman, pa delivre lo travay Gouvernman a tan, e a en nivo ki akseptab.

Sa bann kontrakter pou nepli ganny aksepte pou fer laplikasyon pour okenn Proze Gouvernman, si zot performans pa enn a laoter.

Zesyon Proze Kapital, pou osi bezwen ganny zere pli byen. I annan tro bokou labi kot bann pri ki ganny *tender*, i ganny mete tre ba par bann kontrakter, zis pour zot ganny en Kontra. E apre ki nou war, bann kontrakter i met bann demann pour bann peyman adisyonnal ki ganny dir i bann *cost over-run*.

Gouvernman pa pou toler okenn zofisye proze e prokirman dan Gouvernman, ki fer bann kolizyon ek kontrakter

pour zot prop benefis. **Sa i en *warning* tre kler ki mon pe donner ozordi.**

Pandan bann semenn ki vini, nou pou osi komans en seri legzersis pou revwar nou bann depans ki ganny fer lo serten laliny bidzeter.

Nou vwar ki Gouvernman i depans tro bokou lo sekirite, lo lwe bann akomodasyon, oubyen biro e servis netwayaz ki ariv en sonm total R808.9milyon par lannen.

Nou pe demann avek tou bann propriyeter, bann landrwa ki Gouvernman pe lwe, pou apartir Fevriye 2021, pou ofer en rediksyon ziska 25poursan lo bann lwaye ki zot pe donn bann Minister, Departman e Lazans.

Mr Speaker, avek rediksyon taks lo akomodasyon ki ti fer an Zanvye 2020, Gouvernman pa'n vwar okenn benefis ganny pase avek li par bann diferan lokater.

Dezyenmman, avek sityasyon ekonomik ki pei pe pas ladan, Gouvernman in met bokou *Scheme* pou asiste biznes e endividi. Me par kont, nou pa'n vwar bokou propriyeter ki'n aziste zot bann pri, pou li osi ed bann lokater ki'n eksperyans rediksyon dan zot saler e reveni.

Alor mon pe fer en lapel, pour ki nou tou, nou komans zwe nou rol dan sa peryod difisil, e pa ekspekte ki i selman rol Gouvernman pou donn lasistans dan bann sirkonstans koumsa, e ki zot, zot kontinyen anmas reveni parey avan.

Lo servis sekirite, nou pou osi revwar fason nou donn sa servis. Gouvernman pou bouz plis lo servi bann lekipman sirveyans, ki fer ki nou pa pou bezwen depans sa kantite lo bann pri egzorbitan pou donn sa servis.

Dan menm kad, nou pou revwar fason ki Gouvernman i *outsource* servis netwayaz serten lofis, semen, lans e larivyer, kot Gouvernman pe depans R301.1milyon par lannen.

Tender netwayaz in vin enn ki'n ganny tro politize, dan lepase. Alor en revi pou ganny fer pou asire ki alokasyon bann landrwa pou netwaye i ganny fer dan en fason ki anmenn valer pour larzan. Dan plas kas bann Kontra an pti morso e ki vin tro ser e ki aprezan nepli soutenab.

Mr Speaker, Gouvernman in osi obzerv bokou pratik koripsyon dan prokirman bann

byen e servis dan bann Minister. I pa akseptab pou bann Minister, fer biznes ek zot prop *staff*, ouswa *staff* i ganny alokasyon louvraz, e servi zouti Gouvernman pou fer zot prop biznes avek.

Prensip konfli lentere i bezwen vin enn priyorite pour bann sef, bann lorganizasyon Gouvernman.

I pa akseptab ki bann tel O Zofisye, i permet sa bann pratik pou ganny fer dan zot prop lorganizasyon. Tou bann O Zofisye pou bezwen pran responsabilite personnel, pou okenn pratik koronpi ki pase dan zot lorganizasyon.

Mr Speaker, nou'n fini komans obzerv bann linisyativ pou redwir depans Gouvernman dan plizyer son bann departman. Par egzanp, Departman Zafer Etranzer, in depi en pe letan konmans en demars pou restriktir sa departman avek bi redwir depans ki i fer.

Sirtou depans an deviz etranzer, san ki i konpromi son prezans e langazman avek bann partener enternasyonal. Sa restriktirasyon i enkli fermtir trwa Lanbasad aletranze. Notaman *Havana*, *Colombo* ek nou reprezantasyon *Geneve*.

Sa i vedir ki ozordi La Diplomasi Sesel i annan selman

9 Lanbasad aletranze. Konzwentman avek divizyon ki pour responsab pou promosyon tourizm, bann Lanbasad dan serten landrwa pou osi ganny servi koman Biro Tourizm Sesel. Sa legzersis i ankor pe kontinyen.

An plis ki sa, Gouvernman in osi deside ki serten bann Lanbasad ki reste, pou ganny zere par selman enn olye ki de Diplomat Seselwa parey in le ka dan lepase. Swa nou pou gard en *Chargé D’Affaires*, ouswa en Anbasader tousel dan sa bann Lanbasad.

Sa pou osi redwir depans ki nou fer, konpare avek ler nou annan de Seselwa pe travay dan en Lanbasad. Pou kapab kontinyen deservi la diplomasi Sesel byen, lo en nivo profesyonnel e alaoter, nou pou siport nou bann Lanbasad, avek nou bann reprezantan Konsil Onorer ki ganny trouve dan plis ki en santenn pei atraver lemonn.

En revi in fini konplete, ki’n revwar lalis nou bann Konsil, e ranplas bann ki pa ti pe performen. Nouvo lapwentman in osi ganny fer kot i neser.

Gouvernman in demann tou son bann Konsil pou renouvle zot langazman dan sa demars. I byen note ki travay

en Konsil Onorer i gratwit anver Larepiblik Sesel.

Departman Zafer Etranzer pe osi investir bokou plis dan bann miting vertyel, ki fer ki Sesel i kontinyen reste angaze avek lemonn, menm si nou pa kapab vwayaze. Sa in osi redwir depans san ki i afekte nou bann fonksyon prensipal.

Avek sa bann restriktirasyon, ozordi Bidze Departman Zafer Etranzer in sorti R108milyon 700mil an 2020 pou ariv R93milyon 464 mil i an 2021. Sa i en rediksyon R15milyon 236 mil.

5.3.3. Program lenvestisman kapital

Mr Speaker, Program Gouvernman pou lenvestisman kapital pour lannen 2021 ziska 2023, i ariv en total R4.7bilyon. En total 40poursan sa lenvestisman in ganny bidzete dan lannen 2021. Ki reprezent en sonm R1.9bilyon.

Total alokasyon Bidze Kapital pour lannen 2021 i reprezent en logmantasyon 58poursan konpare avek Bidze Lenvestisman Kapital, ki ti ganny bidzete pour lannen 2020.

Sa logmantasyon i an rezilta serten nouvo gro proze kapital, ki ekspekte ganny

finanse dan sa lannen, atraver bann don finansyel e bann det eksteryer, sirtou dan Sekter Ledikasyon e Lasante.

Total Bidze Kapital ki pe ganny finanse par bann don e det eksteryer, in ogmant an mwayenn par plis ki 100 pousan, konpare avek Bidze 2020. Alokasyon Bidze ki pe ganny finanse atraver *Domestic Financing* in redwir par 6 pousan, konpare avek Bidze 2020.

Sa rediksyon i akoz Gouvernman pe finans zis bann proze ki deza an staz lenplimantasyon. Serten bann proze mazer ki pe ganny finanse dan Bidze 2021, dapre zot diferan sours finansman i *comme* swivi;- Proze ki pe ganny finanse par Bidze lokal i:

-

- Kontinyasyon konstriksyon proze lakaz, avek en alokasyon R120million,
- Kontinyasyon proze konstriksyon dan nouvo blok Lekol Belonie Segonder, avek en alokasyon R10milyon.
- Kontinyasyon konstriksyon Lakres Anse Royale, avek en alokasyon

R9.7milyon,

- Konstriksyon nouvo Sant Lapolis La Digue, avek en alokasyon R6.7milyon,
 - Kontinyasyon trwazyenm faz semen Pasquere lo Praslin, avek en alokasyon R5milyon.
 - Konstriksyon nouvo *Vehicle Testing Station* lo Praslin, avek en sonm R2milyon.
 - En total R21.3milyon pou diferan proze dan Sekter Lagrikiltir, enkli R5.4milyon pou kontinyasyon proze pou konstrir Fasilite Resers Anse Boileau.
 - Serten proze ki target lenfrastruktir ekonomik, ki enkli dezyenm porsyon Proze Endistriyel lo Zone 20 e devlopman lo Zil Eve avek en alokasyon total R36.8million.
2. Proze ki pe ganny finanse par det eksteryer, sa i enkli,
- Re-konstriksyon Lekol La Rosière,

avek en alokasyon R38milyon.

- Konstriksyon nouvo fasilite pou Lenstiti Lagrikiltir ek Ortikiltir, avek en alokasyon R25.9milyon.
- Kontinyasyon proze *Health Information System*, avek en alokasyon R76.6 milyon.
- Konstriksyon nouvo fasilite *jetty* pou Gard Lakot, avek en alokasyon R21.2 milyon.
- Lakizisyon lekipman pou diferan lekol primer e lakres avek en alokasyon R22.9 milyon.
- En total R83.9milyon pou finans bann program ki deza pe ganny enplimante dan Sekter Lekonomi Ble.

3. Proze ki pe ganny finanse par don eksteryer;-

- Kontinyasyon batiman *SBC House*, avek en alokasyon R36.4milyon, finanse par Gouvernman Lasin.

Konstriksyon nouvo *Headquarters* Lapolis, avek en alokasyon R84.9milyon, pou ganny finanse par Gouvernman Lenn.

- Konstriksyon nouvo Lopital La Digue, avek en alokasyon R73.7milyon i ekspekte ganny finanse par Gouvernman *UAE*.
- Konstriksyon nouvo batiman pou lofis *Attorney General*, avek en alokasyon R110.2milyon pou ganny finanse par Gouvernman Lenn.
- Konstriksyon nouvo Klinik Baie Lazare, avek en alokasyon R44.2milyon.
- Konstriksyon nouvo Sant Izolasyon, avek en alokasyon R39.8milyon.
- Lakizisyon en bato patrol pou Lafors Defans, avek en alokasyon R340milyon finanse par Gouvernman Lenn.
- Konstriksyon nouvo *Drug Rehabilitation Center*, avek en alokasyon R34.5milyon i

ekspekte ganny
finanse par
Gouvernman UAE.

Apart bann alokasyon Lenvestisman Kapital pour bann Minister, Departman e Lazans, Gouvernman in osi fer provizyon pou donn bann don devlopman serten Lantrepriz Piblik.

En total R180.8million in ganny bidzete, pou bann don devlopman an 2021. Ki konpri R78milyon pour *SPTC*, R62.8 million pour *PMC* e R40milyon pour *PUC*.

SPTC i ekspekte aste an total, 55 nouvo bis, e sa pou ganny finanse par en *loan* avek Gouvernman Lenn pou en sonm R63.5milyon.

Gouvernman osi pou asiste *SPTC* avek en sonm adisyonnal R14.5milyon ki pou al anver son bann proze kapital.

R62.8milyon in ganny bidzete pour *PMC*. R52.8milyon dan sa sonm pou al anver repeyman pret, ki *PMC* ti pran avek *Nouvobanq* ek Fon Pansyon Sesel pou konstriksiyon bann proze lakaz. E R10milyon pou bann louvraz reparasyon, lo bann flat ki ganny zere par sa lazans.

Gouvernman pe osi fer provizyon en sonm R40milyon

roupi pou bann proze kapital ki pe ganny enplimante par *PUC*.

5.3.4 Benefis e Program Lazans Proteksyon Sosyal (ASP)

Mr Speaker, en sonm R1.425bilyon pe ganny propoze dan Bidze Benefis ek Program pour Lazans Proteksyon Sosyal. Sa sonm, i mwens ki sa Bidze R1.658bilyon ki *ASP* ti gannyen lannen pase. Sa rediksiyon i akoz serten depans swivan.

- Alawenns pour bann etidyan pos segonder,
- *Scheme* Aprantisaz,
- *URS*,
- *Vulnerable Home Repair e Dedicated Fund*

pou aprezan ganny zere par bann Minister respektif, olye par *ASP*.

Sa i ava redwir bann prosedir, e asire ki *ASP* i selman konsantre lo son bann prop *Scheme*.

5.3.5. Sibvansyon pour bann lantrepriz piblik

En Bidze R220.8milyon pe ganny propoze pou sibvansyon bann Lantrepriz Piblik pour

lannen 2021. Pour lannen 2020 ti annan en sonm R413milyon ki ti ganny bidzete.

Dan sa sonm, R133milyon in ganny propoze pou *Air Seychelles*, dan ki R103.724 milyon pou kouver lasistans saler, ki'n ganny *cap* a R30 mil e pour 9 mwan selman.

En sonm R50milyon pe ganny osi propoze pour *SPTC* pou asiste li avek kontrent reveni.

Gouvernman pe osi asiste detrwa Lantrepriz Piblik avek zot peyman saler pour sa lannen, vi ki zot depan lo aktivite tourizm e osi bann ki'n eksperyans bes dan zot bann reveni.

Sa bann Lantrepriz Piblik i *comme* swivan.

- R14.8milyon pour Lotorite Park Maren Sesel,
- R15milyon pour Servis Lapos Sesel, e
- R7.6milyon pou Lenstiti Guy Morel.

Mr Speaker, nou pou osi bezwen travay tre pros ek bann lezot lantrepriz, ki annan gran posibilite zot aktivite i kapab ganny afekte, si sityasyon pa amelyore. Par egzanp Lotorite Lavyasyon Sivil Sesel (SCAA).

5.3.6. Contingency

Pour lannen 2021, selman en sonm R50milyon pe ganny propoze pour Bidze *Contingency*. An vi defi finansyel, Gouvernman, pa pou dan en pozisyon sa lannen pou pey dezyenm faz konpansasyon pour La Misere, ki fer alors ki sa bann peyman pou bezwen ganny anvoye pour pli tar.

6. Bann mezir fiskal

6.1. Reform taks

Mr Speaker, enn mon lot priyorite, se lo modernizasyon Komisyon Reveni Sesel (*SRC*). Kot priyorite sa lannen se pou amelyor *compliance*, e dezyenmman bouz lo servis elektronik.

Avek bi amelyor sistenm *ASYCUDA*, *SRC* pou fer serten *upgrade* lo sa sistenm pour li pli kapab deservi son fonksyon.

Ladwann pou osi bouz lo servis *online*, e redwir bann tranzaksyon lo papye. Sa linisyativ ava permet bann deklarasyon ladwann asosye avek lenportasyon ek leksportasyon ganny fer elektronikman. Sa i ava ede redwir kou e letan, ki pran pou desarz marsandiz lo Por e Erport. E sa i ava osi redwir kou

leksportasyon pou bann biznes lokal.

Sistenm *Cargo tracking* pou osi ganny met an plas. Ki pou permet idantifye risk asosye avek bann kargezon depi zot lorizin, ki ava ede pou *facilitate* desarz marsandiz dek ki i ariv Sesel.

Me sa bann mezir lo zot menm, pa pou adres tou bann defi lo *clearance* marsandiz lo Por avek Erport. Nou lenfrastruktir Por ek Erport pa konvenab pou lakantite aktivite ki pase dan sa de fasilite. Pour bokou lannen sa de lenfrastruktir kle dan nou lekonomi in ganny neglize e napa ase lenvestisman ki'n ganny fer. Sa pou vin en priyorite kle sa nouvo Gouvernman.

An sa ki konsern bann lezot servis, pou annan travay ki pou ganny fer pou amelyor bann servis *online* ki egziste an se moman. Nou pou agrandi bann servis ki kapab ganny fer *online*, tel koman anrezistre bann biznes, soumet bann *returns* ek bann lezot form ki bann *International Business Companies (IBCS)* i bezwen soumet.

Pou amelyor koleksyon e lobligasyon taks bann biznes, pou annan sanzman lo fason

SRC i fer bann taks *returns*, pou amelyor *compliance*.

Gouvernman pou bouz lo en sistenm *default assessment*, dan plas zis depan lo *self-assessment*. Sa i ava asire ki plis *tax payers* i ganny kouver dan bann lodit, e ki i asire ki tou biznes pe fer son peyman taks parey i oblize fer.

SRC pe an se moman resevwar bann lenformasyon anba *Global Forum'S Automatic Exchange of Information*, kot bann Lenstitisyon Finansyel ki raport ek Sesel depi 2017.

Malerezman nou napa okenn sistenm an plas ki ede zer sa bann lenformasyon. Alors, avek bi permet SRC kapab servi sa bann lenformasyon, pou fer bann odit e idantifye bann biznes ki depoz zot larzan aletranze, me ki pa deklar sa bann larzan dan zot taks *return* isi, SRC pe fer evalyasyon lo de propozisyon ki zot annan pou enstal en nouvo sistenm.

6.1.1. Reform lo taks lo biznes

Mr Speaker, an Desanm 2020, Gouvernman ti organiz en seri miting konsiltativ ek sekter prive, avek bann diferan lasosyasyon biznes, pou diskite en nouvo rezim taks lo biznes.

Akoz bann seri restriksyon sa lannen nou pa'n kapab konplet sa proze. Alor, nou annan plan termin sa seri diskisyon, partikilyerman avek Sekter Lapes ek Lagrikiltir pou met an plas en nouvo rezim taks lo biznes sa lannen.

Polisi Gouvernman lo taks i tre kler. Tou biznes ek endividi, nenport ki sekter ki i ladan, i bezwen fer son par e kontribye baze lo son performans.

Prensip taks lo biznes, i enn ki bezwen takse profi, e sa to taks i bezwen enn ki ekitab, inifye e aplik pour tou sekter e biznes.

Tre byento, Gouvernman i annan plan pou redwir taks lo biznes e fer li vin enn ki pli rezonnab. To taks, ki pou aplikab pour *comme* swivan;

- 15poursan lo profi ziska R1milyon, e
- apre sa 25poursan lo profi ki par lao R1milyon.

Gouvernman pou mentenir opsyon taks' *presumptive*' ki ganny sarze lo bann pti e mwayen lantreprenner, ki zot reveni i anba R1milyon par lannen.

Nou'n osi konmans travay pou asire ki nou pou annan an

plas bann gidans e Polisi apropiye, ki pou asire ki nou pa annan reveni ki ganny *erode* ouswa perdi, par bann biznes ki fer *international profit shifting*.

Sa i enn bann sironstans, kot bann biznes i fer bann tranzaksyon pou bouz tou zot larzan dan zot bann *headquarters* an deor Sesel, pour ki zot redwir zot loblighasyon taks isi.

An dizan sa, Mr Speaker, apartir le 01 Avril 2021, Gouvernman pou aboli taks CSR, ouswa *Corporate Social Responsibility Tax*. Sa taks, i enn pinitive ki takse biznes lo son reveni, e alor pa rekonnèt zefor lantreprenarya.

Par aboli CSR taks, sa pou osi donn bann biznes serten soulazman dan sa peryod lensertitid, kot i ava permet bann biznes pou retenir serten *liquidité* pou kapab opere.

Parkont Mr Speaker, i reste responsabilite tou biznes pou an retour investir dan zot kominote.

I pa aköz ki Gouvernman in aboli sa taks ki bann donasyon ki bann biznes ti pe fer avan pou bann koz saritab i devret ganny arete, me i zis ki i pa rol Gouvernman pou fors en biznes fer donasyon, e en biznes i ekspekte en keksoz an retour.

Nou bezwen komans re-pratik, donn ek nou leker.

An sa ki konsern taks lo valer azoute (VAT), pou annan plis travay ki pou ganny fer par Komisyon Reveni, pour ki nou asire ki bann biznes ki kolekte VAT, me ki apre pa remet sa taks avek Gouvernman, i arete enn fwa pour tou.

Gouvernman pou donn tou son sipor neserer SRC pou fer sa louvraz. Sa bann ki pa pe *comply* avek Lalwa VAT, mon pe anvoy en mesaz tre for pou zot regulariz zot sityasyon taks akoz, nou a pe entansifye nou *compliance*.

Lo sa size koleksyon taks, mon fer en konklizyon ki senp e ki mon krwar tou dimoun pou dakor avek.

Prensip sa Gouvernman, parey mon'n dir pli boner, se pou rod en mwayen pou redwir taks lo endividi e lantrepriz.

Nou pou reisi dan sa latas, selman si tou dimoun ki dwa taks i pran son responsabilite e pey son taks. Mon lans en lapel, pou tou dimoun pran son responsabilite. E osi fer kler ki bann ki kontinyen kasyet zot reveni e zot profi, nou pe vin rod zot e sanksyon pou sever.

6.1.2. Reform “Excise tax”

En lot landrwa ki nou anvizaze fer reform i nou sistenm *taks' excise'*, ki pe ganny revize pou permet Ladwann pli byen anmas sa taks.

Sa pou ede sirtou dan Sekter Prodiksyon Lalkol kot Gouvernman in idantifye ki i annan serten defayans. Sa reform ki pou enkli, lentrodikeyon en nouvo Lalwa ki ekspekte donn plis Lotorite Divizyon Ladwann pou administre bann kontrol, e osi donn plis gidans bann prodikter lo laplikasyon taks *excise*. Sa i ekspekte ganny anmennen devan Konsey Minis dan premye kar 2021.

6.2. FA4JR

Mr Speaker lo sa ki konsern *FA4JR*, Gouvernman pe pey en total R125milyon par mwan.

Si nou kontinyen avek menm stratezi pou kontinyen donn lasistans tou biznes, Gouvernman pou bezwen R1.5 bilyon pou lannen 2021. **En sonm ki enposib pour Bidze soutenir.**

Parey mon'n deza mansyonnen nou ti annan en total 12,690 etranze a lafen Zanvye 2021 ki pe travay dan pei.

Departman Lanplwa ti resevwar en total 10,412 laplikasyon pour *GOP* pandan 2020 e ladan in aprouv 8,930 aplikasyon.

Alors Mr Speaker, sel konklizyon ki nou kapab tonm lo la se i annan ase travay pour tou Seselwa Sesel. Alors Gouvernman in bezwen revwar son propozisyon *FA4JR* pour lannen 2021 *comme* swivan;

1. Pour Zanyve 2021, tou biznes in ganny peye parey Desanm 2020 eksepte si ti annan okenn travayer ki'n kite lo *payroll* sa anplwayer.

2. Apartir Fevriye 2021, Gouvernman in entrodwir en lalis ki pou kalifye pour lasistans.

3. Pour Fevriye e Mars 2021:

- a) Bann biznes ki lo sa lalis ki kalifye lo Form 1, pour resevwar 50 poursan lasistans.

- b) Bann biznes ki pa lo sa lalis pa pou resevwar lasistans. Bann

biznes ki lo sa lalis ki kalifye lo Form 2, pou resevwar R5,804 e lezot ki pa lo sa lalis pa pou resevwar lasistans.

Gouvernman pe fer sir son program vaksinasyon pe mars byen e sa i ava ede ler nou pei i reouver avek viziter o milye Mars 2021.

Alors Mars 2021, pou dernyen mwan ki Gouvernman pou donn lasistans anba sa *Scheme FA4JR*. Bann biznes pou bezwen restriktir zot lekor, prenon kont nouvo devlopman dan lekonomi.

6.3. Lasistans pou bann biznes avek difikilte likidite

Mr Speaker pou asiste biznes ki'n ganny enpakte avek *COVID-19*, Labank Santral pou kontinyen enplimant *Private Sector Relief Scheme*. Sa *Scheme*, ti ganny entrodwir pou siport bann kou loperasyon bann biznes.

En sonm R500milyon i disponib pour bann pti e mwayen lantrepriz. Sa fasilite i pou bezwen ganny peye lo en

baz 3an, me nou pe agrandi son repeyman pour ariv 5an.

To lentera lo sa *Scheme* i 1.5 pousan avek en garanti 70 pousan par Gouvernman. Sa lot fasilite pour en sonm R750 milyon pour bann biznes ki pli gro avek en to lentera 4.5 pousan pou osi kontinyen.

Sa fasilite i annan an garanti 50pousan par Gouvernman e i bezwen ganny peye lo en baz 3an. Nou pe osi agrandi son repeyman pour ariv 5an.

Diskisyon i kontinyen ant Labank Santral, bann Labank ek sekter prive pou regarde ki manner bann defi dan lenplimantasyon sa *Scheme* i kapab ganny adrese.

Scheme Small Business Support Fund anba Labank Devlopman Sesel, (*DBS*) pou osi kontinyen pour lannen 2021. Sa fasilite i pa pou atir okenn lentera e i a dispozisyon bann pti lantrepriz avek en reveni anyel anba R2milyon.

7. Restriktirasyon dan servis piblik

Mr Speaker, nou annan en ladministrasyon piblik ozordi ki gro e ranpli avek diplikasyon. Sa i fer ki ladministrasyon piblik, i aprezan enn ki pa soutenab e ki avek sa kriz

ekonomik ki nou ladan, prezan in pli agrave.

Nou pou alor kontinyen revwar striktir Gouvernman e met an plas en nouvo ladministrasyon ki pli efikas. Parey in ganny anonse, *STC* pou nepli pey *rent* apartir le 01 Zanvye 2021.

Avek en revi lo manda e fonksyon *Société Seychellois D' Investissement (SSI)*, Gouvernman in pran en desizyon pou ferm sa lakonpanyen.

SSI ti en lakonpanyen ki ti ganny kree an 2008 pou selman tenir bann *shares* ki Gouvernman ti annan. Malerezman apre sa, in grosi lo son fonksyon e menm mont lo manda bann lezot lorganizasyon.

Avek sa reform, bann *dividends* ki ti pe ganny peye avek *SSI* par bann lantrepriz piblik, pou bezwen ganny peye direkteman dan kont Gouvernman.

Sa i a permet annan pli bon zesyon lo nou finans piblik. Bann aktivite ki *SSI* ti pe fer, pou ganny transfer avek bann antite Gouvernman ki deza annan preske menm responsabilite.

Gouvernman parkont, pe donn son langazman ki bann travayer ki'n anploye dan *SSI*,

pou ganny ofer bann lezot pos dan servis piblik.

Gouvernman pou osi kontinyen son travay pou redwir diplikasyon dan bann diferan striktir ki egziste e redwir kou *administrative* sa bann antite.

Dan sa laliny pou osi annan reform *transformative* dan rol ki *DPA* i zwe. Pou asire ki i annan plis lefikasite dan sekter piblik, Gouvernman pou akseler plan pou met an plas en lankadreman ki baze lo rezilta e performans.

Pou annan bon rezilta e bon performans i enportan ki osi ki annan bon planifikasyon. Gouvernman pou bezwen fer sa premye pa, pou asire ki son striktir i enn ki efikas e ki osi permet sekter prive pou zwe son rol dan lekonomi.

Nou bezwen kapab planifye koman en pei, e tou bann Minister e departman i bezwen annan sa responsabilite pou met sa an mars.

Nou pou bezwen adopte en lapros kot nou planifye avan nou depanse, e kot nou depans i ganny evalye pou asire ki i benefisyen nou pep e ki sak endividi i ganny rekonpanse lo son performans. Sa i ava asire ki tou travayer sekter piblik e tou biro Gouvernman pou bezwen rann kont.

7.1. Ler travay fleksib

Mr Speaker, an rezilta sa pandemik e sityasyon ekonomik, nou osi bezwen revwar fason ki servis i ganny delivre.

Dan sa nouvo normal i enportan pour nou vin inovativ e annan en serten degre fleksibilite. Set avek sa antet ki Gouvernman pou akseler zefor pou adopte ler travay fleksib.

Sa i ava ede pour ki bann travayer ava kapab annan en pli bon *work life balance*, ki an retour a ede avek produktivite, responsabilite familyal parmi lezot.

En ler travay fleksib i a osi kapab anmenn serten benefis finansyel sirtou lo kote *child care*. An plis, nou a kapab vwar en rezilta pozitiv lo nou zesyon trafik, vi ki tou dimoun pa pou bezwen pe bouz an menm tan pou komanse, ou termin en lazournen travay.

Parkont, nou rekonnet ki i kapab annan serten defi, espesyalman lo kote enternet, bann lekipman neser pou travay dan lakour, e osi performans endividuel.

Bann Polisi pou alors ganny devlope pou adres sa bann defi, e asire ki i annan en lankadreman pou evalye

performans bann travayer dan sa nouvo normal. I pou enportan ki nou tou koman bann travayer nou pran nou responsabilite anver nou nivo prodiktivite.

7.2. Gouvernans bann Lantrepriz Piblik

Aprè ki Gouvernman ti adopte ‘Code Pour Bonn Gouvernans’ e bann Polisi relye avek bann lantrepriz piblik, *Public Enterprise Monitoring Commission* pou vin le sel lotorite ki pou sirvey sa bann lantrepriz piblik.

Mr Speaker, an kolaborasyon avek bann Minister konsernen e bann *Board* sa bann lantrepriz, sa lotorite pou met bann target pour sa bann lantrepriz, pou fer sir ki zot anmenn en rannman pour Gouvernman e Lepep Seselwa.

Sa lotorite pou osi fer sir ki sa bann target i ganny sirveye e rann kont ek Gouvernman. Bann desizyon ki sa bann lantrepriz pou pran, pou bezwen anliny avek plan Nasyonal.

Lobzektif se ki sa bann lantrepriz i fonksyonn dan lentere Lepep Seselwa e non pa an izolasyon.

Letan kot bann lantrepriz piblik ti dekonekte avek Polisi Gouvernman e kree zot prop lanpir pou nepli ganny tolere.

Tou bann lantrepriz piblik pou bezwen travay dan lentere Nasyonal baze lo gidans Polisi Gouvernman. E an retour bann *Board* i responsab pou enplimant vizyon Gouvernman.

Avek sa, *PEMC* pou ganny donner tou sipor e lotorite nesese pou asire ki manda Gouvernman i ganny enplimante.

7.3. Reform STC

Nou’n obzerve ki avek sityasyon ekonomik ki’n fer nou Roupri in depresye, sa in ogmant pri marsandiz.

Priyosite Gouvernman pour 2021 se pou met an plas bann polisi fiskal ki pou stabiliz to lesanz. Nou antisipe ki ler nou konmans ouver nou lekonomi e Sekter Tourizm i rebran, plis deviz etranzer ava antre dan nou sistenm finansyer.

Sa i a ede pour nou roupri konmans apresye e fer pri marsandiz desann. Parey nou’n obzerve, pri sa 14 komodite esansyel pa’n monte depi 2012.

Sa i menm si nou to lesanz in depresye. In annan

logmantasyon dan fre transportasyon e sanzman dan pri lo marse enternasyonal.

STC pe war li aktyelman dan difikilte pou mentenir sa pri ki ti'n ganny mete an 2012, pou sa bann prodwir, an vi ki pri pou aste sa bann prodwir in monte. *Board STC* in alor ganny manda pou li fer en analiz lo sa size e prezant son propozisyon avek Gouvernman.

Gouvernman pou fer li son priyorite pou reform *STC*, pou asire ki son kou loperasyon i vin pli ba. I pou osi regarde ki manner *STC* i aste son marsandiz pou asire ki i pe aste a en pri pli ba.

Gouvernman i reste angaze pou kontinyen rod fason, pou fer desann pri lavi pour son pep e asir sekirite alimanter.

Pour nou kapab kontinyen garanti sa, Gouvernman pe reviz striktir loperasyon sa lakonpanyen e son sistenm *procurement*, pou asire ki nou retir okenn gaspiyaz, inefikasite e depans inital.

8. Bann sekter

Transformasyon ekonomik

Mr Speaker, pandemik *COVID-19* in montre nou ki manner

nou vreman vilnerab koman en leta zil. Nou pei in parmi enn bann Pti Leta Zil ki son lekonomi in pli ganny afekte.

Sa i akoz sa pandemik in tous nou sours reveni, ki nou Lendistri Tourizm. A sa pwen i enportan note ki tourizm pou reste touzour pilye nou lekonomi.

Alors nou pou bezwen asire ki nou *recovery* i enn ki ede fer nou vin pli rezilyans fas a bann sityasyon eksteryer.

Se pour sa rezon ki nou bezwen ansanm eksplor bann diferan opsyon pour nou transform nou lekonomi.

Dan nou Sekter Tourizm nou bezwen entansifye nou zefor pou ofer plis ki zis nou labote natirel. Nou bezwen kapab osi ofer en leksperyans kiltirel ki a fer ki nou bann viziter ava annan en leksperyans inikman Seselwa.

Dan lagrikiltir e lapes, nou bezwen kapab ankouraz plis devlopman bann prodwi valer azoute, ki a kapab osi anmenn bann loportinite leksportasyon pour nou bann antrepriz lokal.

I pou osi enportan ki nou ankouraz en latitud lantreprenarya parmi nou popilasyon, pou fasilite sa re-transformasyon ekonomik.

Mr Speaker, marse lanplwa i kontinyen ganny afekte par lenpak *COVID-19*, sirtou la ki nou pe ekspekte bann etidyan ki'n termin zot letid ki pe zwenn lemond travay.

A lafen Desanm 2020, Departman Lanplwa ti aprouv 2,763 ka *redundancy* e dan sa sif, 36 pousan ouswa 1,004 ti travayer Seselwa. Ziska le 4 Zanvyè 2021, ti annan 12,690 permi travay aktif pour bann travayer etranze.

An plis, nou kontinyelman vwar demann pour travayer etranze dan laplipar Sekter Lekonomi, enkli dan Sekter Lagrikiltir e Lapes.

Sa bann sekter i annan lanplwa ki Seselwa i kapab fasilman pran avek bann formasyon nesese. E deplis i annan 1,734 laplikasyon an sa ki konsern bann travayer etranze ki'n pri deor pou zot retournen.

Sa i demontre ki i annan ase travay pour Seselwa dan pei. Mr Speaker, mon anvoy en mesaz tre for pour bann travayer e bann ki pe rod lanplwa.

Gouvernman i donn son langazman pou plas Seselwa premye dan lanplwa, bann travayer i bezwen pran zot lanplwa o serye.

I zot responsabilite pou raport travay, vin prodiktiv e fer kontribisyon dan zot landrwa travay. Respekte bann lalwa e lareg zot lorganizasyon, pou anpese zot perdi zot louvraz pour rezon ki pa valab e ti kapab ganny anpese.

Pour bann ki pe rod en lanplwa, se la letan pou aksepte louvraz ki pe ganny ofer, aköz pli tar i pou pli difisil. Ler zot ganny refer pou en lanplwa, pran silvouple.

Ler zot ganny refer pou *interview* al fer zot *interview*. Aret swazir louvraz. Prouv ou lekor e aksepte louvraz ki disponib me pa nesese man swazir louvraz dapre ou preferans.

Pli tar ler lekonomi i ava rebran, ou ava ganny loportinite pour pran en louvraz ki ou ti a swete. Pour bann anplwayer, mon ti a voudre demann zot pour anploy nou Seselwa an premye, avan konsider en travayer etranze e donn zot bann sipor nesese.

Gouvernman in anons en seri reform dan bann prosedir permi travay pour bann travayer etranze. Mon demann anplwayer pour korpere pour asire ki loportinite lanplwa i ganny pibliye byen avek lenformasyon nesese, pour ki Seselwa i ava pli kapab fer

laplikasyon pour sa bann pozisyon.

An plis, zot devret fer li zot devwar pour ofer bann benefis ki osi atiran pour Seselwa, konpare avek sa ki zot ofer pour travayer etranze.

Bann lakonpanyen prive i annan en responsabilite pou montre sa zenn travayer ki pe komans son karyer, en *clear career pathway*.

Sa lotel ou sa labank, i bezwen montre li ki si i performen, si i amelyor son *skills*, li osi i kapab vin en *General Manager* dan en lotel ou en Sef Egzekitiv dan en Labank.

Sa bann pos pa kapab zis pour etranze. Sa pou bezwen sanze e nou bezwen valoriz nou prop dimoun. Seselwa i annan talan e si i annan loportinite i pou delivre. Nou reform sistenm *GOP* pou reflekte sa bann prensip. Nou pou travay pou moderniz nou Lalwa Lanplwa, kot nou pou target serten sektor kle dan nou lekonomi, avek bi pou amelyor kondisyon travay pour biznes e osi travayer.

Departman Lanplwa pe travay konzwentman ek sektor prive pour ki lenformasyon neser i ganny donner avek bann travayer ki pe rod lanplwa.

Sa i enkli bann loportinite travay lo nou bann zil elwannen. Mr Speaker, nou pe osi travay lo reform lo bann benefis ek program ki Lazans Proteksyon Sosyal i donner.

Konman en Gouvernman nou bezwen fer sir, nou bann benefis ek program i ganny donner avek bann ki pli vilnerab dan lasosyete.

Nou bezwen osi travay avek bann benefisyer sa bann lasistans, ki zot pa vin depandan lo zis sa bann benefis e program. Bann benefis e program kot Lazans Proteksyon Sosyal i pli gro sonm dan Bidze 2021.

Sa i reprezant 13 pousan Bidze Nasyonal. Parey nou'n anonse nou pou annan en seri reform avek led Labank Mondyal ki pour *comme swivan*;-

- Fer sir ki i annan plis kordinasyon avek bann sektor kle dan pei. E sa nou pou etabli en *social registry*. Sa i ava ede pour ki dimoun pli vilnerab i kapab ganny sa lasistans neser avek tou sektor e koup lo birokrasi. I ava osi ede ki nou donn sipor neser

ki nou bann zanfan dan sa bann fanmir ki ganny negligize e osi nou kapab ed sa bann zanfan pou servi tou loportinite ki devan zot.

- Nou pou moderniz sistenm *Homecare* pour fer sir i pli aksesib pour bann dimoun ki pli bezwen e redwir labi kot i egziste.
- Revwar soustenabilite sistenm benefis retret.
- Re evalye benefis envalidite e dezabilite, pou fer sir ki i tous dimoun avek bezwen fizik baze lo bann standar enternasyonal.
- E revwar nou sistenm lasistans *social welfare* baze lo bann bezwen sosyoekonomik.

8.1. Sekter Tourism

Mr Speaker Sekter Tourism parey mon'n fer resorti, pou reste sa lendistri No.1 pou nou lekonomi. Se pour sa rezon ki i pou enportan ki nou revwar nou stratezi pour ki nou kapab relev sa lendistri e fer li vin pli soutenab e rezilyan.

Mon fyer pou dir ki nou'n fini komans fer sa premye pa, atraver nou program vaksinasyon. Pour plizyer lannen nou'n depan lo nou labote natirel pou atir nou bann viziter.

Menm si sa i reste, nou pou bezwen diversifye bann prodwi ki ganny ofer a nou bann viziter. Serten nouvo prodwi tel ki *cultural tourism*, i a ganny devlope kot nou bann viziter a kapab eksperyans nou leritaz, nou kiltir e nou lakwizin.

Sa i ava ede anmenn plis devlopman dan bann kominote, ki pou anrisi leksperyans nou bann viziter e an retour zot ava depans plis dan pei. Nou osi bezwen revwar bann latraksyon touristik pour ki zot vin pli enteresan pour bann viziter.

Koman en leta zil nou bezwen servi nou losean pli byen e fer plis pou ofer bann aktivite sport lo delo e lezot aktivite lwazir.

A plizyer repriz nou'n tand e ki nou bezwen ogmant

partisipasyon lokal dan sa sekter. Pour ki sa i materyalize i pou bezwen ki nou asire ki sa *supply chain* i byen ganny etabli.

Sa i a osi donn loportinite sa de lezot sekter kle, ki lapes e lagrikiltir, pou osi kontribye dan soulazman nou Lendistri Tourizm e sa nouvo fason fer. Devlopman kapasite imen dan Sekter Tourizm i primordyal dan transformasyon sa sekter.

Nou pou bezwen donn formasyon bann travayer ki deza dan sa sekter e bann ki anvi zwenn sa sekter, afen ki nou ava annan en lafors travayer kalifye.

Sa i a ede pou redwir dependans lo travayer etranze e osi asire ki nou bann travayer i progresse dan sa domenn. Nou bann marse tradisyonnèl Lerop i parmi bann ki'n pli ganny afekte ek sa pandemi.

Alors i pou osi enportan ki nou esey diversifye marse kot nou bann viziter i sorti.

8.2. Sekter Lagrikiltir

Langazman Gouvernman pou Sekter Lagrikiltir pou 2021, se pou donn sipor bann fermye, pou asire ki nou ariv lo nou target pou ogmant prodiksyon zannimo e legim e ed bann

fermye pou avanse dan devlopman zot biznes.

Dan sa demars, Gouvernman pou siport prodiksyon lavyann, pour ki i vin pli konpetitiv akote lenportasyon e kontribye anver sekirite alimanter pei. Target dan mwayen term se pou ariv fer prodiksyon lokal depas omwen lanmwatye sa ki nou konsonmen.

Alor Gouvernman pou asiste lo kou:

- a. pou touy koson avek poul kot labatwar,
- b. fre prodiksyon poul e *pork* pou sak fermye,
- c. fre adisyonnèl lo en pti poul.
- d. Bann logmantasyon dan pri manze zannimo.
- e. E fre transportasyon manze zannimo ant Mahe ek bann lezot zil.

Mr Speaker, labatwar Praslin pou ganny konplete sa lannen, avek sipor lekipman e sipor teknik sorti kot Linyon Eropeen. Gouvernman in deza idantifye nouvo landrwa pou labatwar lo Mahe e nou ekspekte ki sa i ava ganny, i a demare tre byento.

Gouvernman pou fer en alokasyon finansyel dan Labank Devlopman Sesel (*DBS*)

pou *facilitate* akse avek finans pour bann ki dan prodiksyon.

Scheme Agriculture Development Fund, pou ganny revize e pou aprezan donn *loan* a en limit R5milyon konpare avek selman R1milyon, ki leka ozordi.

Lentere ki pou aplike lo sa *Scheme* pou 2.5poursan lo bann *loan* ziska R3milyon, e pour bann laplikasyon ki par lao R3milyon, pou annan en to lentere 5 poursan ki pou aplike.

Sa pe ganny fer pou ankouraz bann fermye debourye e agrandi zot bann aktivite. Mr Speaker, i enportan a sa moman ki mon fer li tre kler ki'n annan labi dan sa *Scheme* oparavan.

Sa *Scheme* in montre ki bokou ki'n benefisyé pa'n fer sa zefor pou re-pey zot *loan* e i annan menm ki'n aret peye konpletman.

Mon pou alor demann bann ki'n benefisyé avek sa bann *loan*, pou onor zot lagreman e ede ki lezot i a kapab osi benefisyé.

Later lagrikiltir ki'n ganny donnen avek fermye me ki pa'n ganny servi pou prodiksyon, pou ganny repran lo en baz akselere e ganny donnen avek bann ki pare pou fer en travay serye pou prodwir.

(APPLAUSE)

MINISTER NAADIR HASSAN

Sipor pour bann zenn dan lagrikiltir pou kontinyen avek lazisteman dan resours, anmezir ki keksoz i avanse.

Gouvernman pou rod en meyer metod, pou asiste bann zenn ki'n ganny promet fasilite me ki pa ankor ganny asiste anba program *La Semence* espesyalman bann Au Cap. E osi konsider lentegrasyon pli vit bann zenn lo bann later lagrikiltir kot i annan, pou ede ki sa bann zenn pa perdi lentere dan sa sekter.

Alor mon demann Minister Responsab pour Ledikasyon ek Lagrikiltir, pou revwar ki mannyer fasilite lekol ek bann aktivite i kapab ganny entegre avek bann sant pou lagrikiltir, parey Sant Resers.Nou Plan pour le fitir, se ki sa sant i ofer bann kour pour adilt ki deza dan lagrikiltir, pour ki zot devlop zot plis zot konesans ek abilite.

Gouvernman pou fer provizyon bann materyo nesese pou sa sekter parey langre ek pestisid, akoz nou bezwen sa garanti pou bann prodikter. An menm tan, Gouvernman pou osi eksplor loportinite pou sekter prive zwe en pli gran rol dan sa servis, ki

ava facilitate akse avek materyo ki ferme i bezwen.

Dan menm laliny, nou pou bezwen anmenn sekter prive dan lezot aktivite ki tradisyonnelman se Gouvernman ki'n fer dan lagrikiltir. Sant Zenetik pour koson, i enn bann aktivite ki pou ganny revwar e transfer avek bann ferme ki montre lentere e annan kapasite.

Dan sa bann laranzman, Gouvernman an servan son bann lyen enternasyonal, i ava reste koman fasilitater e donn sipor teknik bann ferme ki bezwen.

Sa pandemik in met devan nou sa nesesite pou depann plis lo nou lekor e rod bann fason pour ki koman en pep, nou vin pli rezilyan an servan sa ki nou annan.

Imedyatman, Gouvernman pou reviz lafason ki i donn permisyon ferme ki fer elevaz poul. Minister Lagrikiltir pou fer en revizyon e analiz avek bann ferme, ki anvii ogmant zot prodiksyon, baze lo zot soustenabilite e planifikasyon zot teren, e permet zot ogmant zot prodiksyon kot zot kapab.

Gouvernman pou osi dan sa lannen, ouver posibilite pour bann endividi ou group prive komans omwen de laferm

parent stock, pour ki pei a kapab prodwi dizef pou eklo lokalman.

Sa i a ed nou koup lo lenportasyon dizef pou *hatchery* e fer desann pri pti poul, ki aktyelman pe kout plis ki R18.

Nou bezwen kontinyen ankouraz sak lakour pou aste prodwir lokal e fer sa ki zot kapab pou ekonomize e koup lo lenportasyon sa ki nou konsonmen. Se dan sa fason ki nou pou kapab relev nou pei, e Gouvernman i la pou siport nou bann sitwayen dan sa demars.

8.3. Sekter Lapes

Mr Speaker, si i annan en sekter dan nou lekonomi ki ankor byen lwen ek son potansyel, se Sekter Lapes. Dan sa letan kot *COVID* in tap nou pei e fer bokou ditor nou lekonomi, bokou dimoun ki pa ti pe war vre lenportans lapas, in aprezan konpran ki si nou napa en dezyenm pilye ekonomik pou soutenir nou pei, nou pa pou kapab progrese dan nou devlopman.

Prezidan Ramkalawan avek son lekip dan Gouvernman, depi lontan pe dir ki fodre nou port plis latansyon lo sa sekter. Menm avan ki dernyen lakor lapas ti ganny renouvle avek Linyon Eropeen

lannen pase, nou ti demande ki Sesel i ganny en pli bon dil.

Wi, sa Gouvernman i krwar senserman ki nou kapab ganny plis avek nou lapès. Se pour sa rezon ki tre byento nou pe al anonse ki Sesel i ouver pour lenvestisman dan sa bann sektè swivan;-

- Konstriksyon nouvo lasose pou resevwar plis bann bato *long line* ki pe deza lapès dan nou delo me ki pe fer zot transbordman swa lo lanmer, swa dan en lot por dan Losean Endyen.
- Konstriksyon nouvo lasose e amelyorasyon sa bann ki deza egziste, pou *facilite* tranzaksyon bann bato sener.
- Konstriksyon en *dry dock* pou fer bann gro louvraz lo bann bato lapès endistriyel.
- Konstriksyon fasilite pou reparasyon elektronik e elektromekanik lo bann bato lapès.
- Konstriksyon lizin pou fer transformasyon

pwason, sirtou ton, pour nou pei kapab ganny plis valèr avek sa resous enportan.

- Devlopman meyer fasilite pou reparasyon lasenn.
- Devlop e amelyor bann fasilite dan bann distrik pour nou peser artizanal.
- Konstriksyon en fasilite lo Erport pou resevwar pwason ki pe ganny eksporte.
- Konstriksyon e devlop en limaz kalite pou nou eksport nou pwason e nou prodwi lanmer lo nivo enternasyonal.

Mr Speaker, nou pe lans en lapel pou investiser Seselwa pou antre dan sa Sektè Lapès, agrandi li e anmenn larises pour nou pei e nou pep e nou pei.

Nou Gouvernman pou donn Seselwa priyorite lo etranze. Kot nou napa larzan ouswa lekspertiz, nou pou ankouraz bann *joint ventures* kot Seselwa pou annan son par dan tou profi.

Sa bann lenvestisman pou kree larises san ki nou bezwen lapès plis. Moto nou Gouvernman se pou azout valèr

avek nou pwason, san ki nou eksplwat sa resours tro bokou.

Nou ekspekte ki dan sa prosen 5an, nou pou kapab kree plis ki 1500 louvraz dan sa sekter e double lakantite pwason ki ganny transborde dan Port Victoria. Gouvernman pe osi kontinyen ranforsi son zefor pou devlop Sekter Lekonomi Ble. Annefe sa lannen en proze pou devlopman endistriyel dan Sekter *Marine Biotechnology* in komans materyalize. Atraver en don ki nou ti gannyen avek Labank Devlopman Afriken, nou'n komans fer bann mizanplas pou ki nou kapab annan transformasyon konkret lo nou potansyel pou devlop sa lendistri e osi pou idantifye bann biznes e ranman ki sa lendistri i kapab anmennen pou nou pei.

Sa proze pe osi met lanfaz lo laprantisaz atraver lantrenman en santenn lantreprenner ki enteres pou antre dan sa sekter. E sa i enkli bann madanm e osi bann zenn.

Sa lendistri ler pou demare pou enn ki pou *vast*, i pou permet nou servi bann resours maren pou devlop biznes dan domenn kosmetik, bizoutye medikal e lezot domenn, kot resers anba sa proze in montre nou i annan

potansyel. Sa i avek bi anmenn devlopman osi dan nou lendistri lokal, ki a ofer loportinite lanplwa ki o nivo pou nou pep e ki evantyeleman i a *facilitate* devlopman nou lasosyete an zeneral.

An sa ki konsern sa fasilite finansyel ki a dispozisyon pei pou siport devlopman bann prodwi valer azoute dan lekonomi ble espesyalman dan Sekter Lapes, Gouvernman i annan plezir pou anonse ki in fek konklir en renonsyasyon avek Labank Mondyal, lo bann term e kondisyon ki pli favorab pou bann lenvestiser ki anvi ganny akse a sa fon.

Bann biznes ki kapab benefisyen anba sa fon se ;-

- Bann ki ofer servi syantifik pou Sekter Lapes, ki enkli resers dan domenn alimenter tel ki bann fridmer.
- Bann ki ofer bann servis lozistik tel parey *packaging*, distribisyon, *marketing* e lavant.
- Bann ki fer *fish processing* ki anmenn plis valer azoute lo nou bann pwason ki ganny lapes;

- E bann ki dan sa biznes *fish processing* ki oule devlop bann teknolozi e fer bann nouvo oubyen repar bann vey fasilite pou ranforsi zot biznes.

Alors nou pe ankouraz e lans en lapel avek lenvestiser ki kalifye anba sa fon, pou servi sa fasilite ki anba zot dispozisyon.

8.4. Sektor “Digital Economy” (Lekonomi Enformatik)

Mr Speaker, lemonn in fini antre dan *digital era* e Sesel pa kapab ganny kit deryer. Sa revolisyon ki lemonn in pas ladan dan devlopman teknolozi, i kapab anmenn bokou benefis pou nou pei. Nou alor bezwen met an plas bann Polisi e striktir pou nou kapab devlop nou Sektor *Digital Economy*. Dan sa bann mwan ki pe vini, Konsey Minis pou konsider bann diferan Polisi pou nou met an plis e devlop sa sektor. Sa bann linisyativ pou kapab anmenn bokou benefis pou diferan Sektor nou lekonomi.

En sistenm *E-government* ki nou’n ganny promet pou plizyer lannen, i annan posibilite anmenn bokou benefis pou amelyor lafason ki Gouvernman i delivre son

servis. Nou bezwen arete ek bann prosedir *manual* e entrodwi bann prosedir elektronik. Sa i a fer servis ki Gouvernman i donn piblik i vin pli efikas e pli vit. I pou osi anmenn pli latransparans e redwir posibilite pou bann pratik koronpi.

Devlopman sa sektor i a osi kre loportinite biznes e lanplwa pou nou pep. Nou sistenm ledikasyon pou bezwen enkli sa dan son *curriculum*. Plis konteni enformatik pou asire ki sa prosen zenerasyon travayer i ava annan sa zouti pou kontinyen devlop sa sektor.

8.5. Sektor Ledikasyon

Mr Speaker, ledikasyon i kontinyen reste en priyorite pou sa nouvo Gouvernman e malgre tou sa difikilte ekonomik ki nou pei pe pas ladan i pou neser ki nou kontinyen lev laspirasyon bann etidyan pou ki zot fer zot mye pou reisir dan letid a tou nivo.

Minister Ledikasyon pou met an plas son plan ver en nouvo sistenm ledikasyon, ki nou pe swete vwar Sesel. Minister Ledikasyon i rekonnèt ki pou nou kapab annan en lekonomi ki dirab, i pou neser ki tou dimoun dan sa sistenm enkli bann etidyan zot pou

bezwen a tou pri redwir gaspiyaz.

An plis ki sa i pou bezwen annan bann nouvo lapros anver litalizasyon bann nouvo pratik ki ava permet plis lanfaz e resours ganny mete lo lansennyman e laprantisaz. En dezyenm laspe pou fer plis lekonomi sirtou sa lannen, dan sa letan *COVID-19*, Minister Ledikasyon pe ankouraz bann etidyan pou swazir bann diferan opsyon fer zot letid parey letid *online*, espesyalman la ki i pa posib pou vwayaze. E osi ankouraz bann etidyan ki kalifye pou en labours, pou zot swazir bann labours ki pei i annan koman kado avek bann lorganizasyon dan lezot pei etranze.

Nou pe lans lapel pou bann lakonpanyen pou osi fer bann labours lo en nivo nasyonal ki a osi ede dan devlopman kapasite bann mendev dan diferan sekter.

Gouvernman atraver Minister Ledikasyon i krwar ki zanfan Seselwa i devret aspire pou ganny sa pli meyer ledikasyon posib. Nou anvi antre an partenarya avek en lenvestiser prive, ki pou enterese, ki pou nou kapab kree en Lekol Par Ekselans ki a vin en lekol modern e konpreansiv pou nou zanfan. Deza i annan

group e endividi ki pe eksprim lenterere, fer ankor lezot lekol prive, pou tir presyon lo bann lekol dan lavil ki deza vreman plen. Gouvernman pe etidye posibilite servi Regina Mundi pou sa proze.

An menm tan nou pou travay dir pou ekip e moderniz bann lezot lekol ki egziste pou ki dan zot menm zot vin bann pti sant ekselans dan tou nivo e laspe. Minister Ledikasyon i annan en nouvo plan tre anbisye ki viz ver sa lobzektif.

8.6. Sekter Finansyel

Mr Speaker, Sekter Finansyel i en sekter ki annan potansyel pou devlope. Me nou bezwen fer sir ki Sesel i an konformite avek Lalwa Enternasyonal. Alors Minister responsab pour Finans pou etabli en Komite avek tou bann akter kle dan sa sekter pou travay lo en plan Nasyonal pou fer sir ki nou devlop sa Sekter pou kree plis lanplwa e ganny plis deviz etranzer.

Avek sa, pou osi annan en nouvo divizyon ki pou ganny kree dan Departman Finans, ki pou spesyaliz spesifikman avek sa Sekter.

Mr Speaker, lannen 2021 i trwazyenm e dernyen lannen pou nou fer sir ki nou amelyor

nou bann Lalwa, pou met li azour avek bann bon pratik anba lankadreman anti blansisaz larzan e pou lit kont finansman terorizm, (*AML/CFT*) e sa i dapre standar *Financial Action Task Force (FATF)*.

Nou pou anmenn devan Lasanble bann lamannman dan sa bann Lalwa swivan ;-

1. *Prevention of Terrorism Act*
2. *Mutual Assistance in Criminal Matters Act*
3. *Extradition Act*
4. *Registration of Association Act*
5. *Beneficial Ownership Act*
6. Lalwa Anti Blansisaz Larzan e pou lit kont Finansman Terorizm (*AML/CFT*)
7. Lalwa ki Gouvern Lankadreman *Licensing*.

Gouvernman pou osi anmenn en nouvo Lalwa pou met en lankadreman an plas ki pou Gouvernen bann *virtual asset providers*. Nou espekte konplet sa bann travay e anmenn sa bann lamannman avan Zilyet 2021.

Mr Speaker, an Desanm 2020 Lasanble Nasyonal ti aprouv lamannman dan Lalwa Taks Biznes, baze lo lobligasyon Linyon Eropeen kot i konsern

taxation. Parey zot okouran Linyen Eropeen ti met Sesel lo son lalis ziridiksyon ki pa korpere avek zot dan son sistenm taks.

Mr Speaker, parey mon ti mansyonnen ler mon ti prezant sa Prozedlwa devan Lasanble Nasyonal, nou ti entrodwir en *De-Minimis rule threshold*, ki pou ekskli bann antite ki pa riske. Linyon Eropeen pe prezant sa ka devan zot Komite avan ki zot kapab fer nou okenn si nou kapab adopte sa pratik. Nou pe esper zot larepons avan ki nou fer okenn lamannman adisyonnèl dan *Schedule 11* sa Lalwa.

Dezyenmman konponan ki pou kapab tir Sesel lo lalis Linyon Eropeen, se ki nou bezwen amenn enn bann lezot lamannman pou adres konsern Lorganizasyon pou Korperasyon Ekonomik ek Devlopman, (*OECD*), sirtou an sa ki konsern lesanz lenformasyon ant bann difer Lotorite Taks. Kot Sesel ti ganny *downgrade* sorti '*largely compliant*' an 2015 pou ariv '*partially compliant*' an Avril 2020. Sesel pou bezwen demann en *supplementary review* pou adres sa bann defayans dan lesanz lenformasyon.

Mr Speaker, nou pou anmenn sa bann Lalwa swivan pou ki nou kapab azour avek lankadreman *OECD*.

1. *International Business Companies, Act*.

2. *Foundations, Act* e

3. *Limited Partnership, Act*.

Nou osi pou propoz en nouvo *Trust Act* ki pou ranplas sa Lalwa aki egziste ozordi ki apel *International Trust Act*.

Priorite Gouvernman se pou devlop en Sekter Finansyer modern e transparan ki pou an anliny avek tou bann regilasyon enternasyonal.

8.7. Sekter Transpor

Mr Speaker, nou bann port e nou Erport enternasyonal i fasilite pli enportan dan devlopman ekonomik nou pei. E Gouvernman pou met bokou latansyon lo amelyor servis e lefikasite dan sa bann departman. Sa zefor pou ganny apiye par en gran proze redevlopman por komersyal, kot nou pe envit bann partner lokal osi ki etranze, pou donn nou konsey lo ki mannyer nou kapab fer sa redevlopman dan en meyer fason. Menm prensip pou ganny aplike lo nou Sekter Transpor aeryen.

O moman ki nou pe reflexir lo en solisyon dirab e lonterm pou nou lakonpanyen aeryen enternasyonal *Air Seychelles*, nou pe osi etidye fason ki nou vin pli efikas e ganny plis reveni atraver nou Sekter Domestik e nou Departman *Ground Handling*.

Size *Air Seychelles* in enn ki annan en kantite deba lo la. Desizyon Gouvernman pou bezwen enn ki baze lo soustenabilite finansyel sa lakonpanyen, me pa enn ki baze lo lemosyon.

Mr Speaker, Gouvernman in apresye bokou sa dyalog ki Lasanble Nasyonal in annan avek bann diferan partner lo lavenir laliny aeryen *Air Seychelles*. Me pandan ki diskisyon in konsantre lo ki mannyer servis enternasyonal *Air Seychelles* i kapab vin profitab, nou'n oublie ki sa lakonpanyen i annan en det plis ki \$152.8milyon, ki anviron R3.3 bilyon pou *Air Seychelles*.

Kestyon ki nou devret pe demann nou lekor se, lekel ki pou pey sa gro det? I kler ki resours finansyel Gouvernman i limite pou li kapab abzorb sa nivo det, menm avek en rediksyon baze lo bann negasyon ki pe ganny fer. De plis sa det i an deviz e se rezerv

Labank Santral ki pou bezwen ganny servi pou pey sa.

Eski nou pou oze pran sa rezerv limite pou kontinyen sibvansyon loperasyon *Air Seychelles*, olye asire ki Lepep Seselwa i ganny lasirans lo bann komodite esansyel tel parey karbiran, manze e latizann? Sa i en kestyon ki mon demann tou bann Manm prezan isi ozordi.

I bon note ki sa sityasyon *Air Seychelles* i pa nouvo e i osi enn ki sa Gouvernman in erite. Pou les sa pti *airline* akimil sa det \$152.8milyon i vremen iresponsab. Sa i en nivo det ki kapab annan lefe tre sever lo nou pti pei.

8.8. Sekter Lenerzi e Sanzman Klima

Mr Speaker, Sesel i ganny rekonnèt e resevwar soutyen bann pei e Lorganizasyon Enternasyonal pou son bann aksyon ki i pe pran dan adaptasyon e zesyon bann defi kree par sanzman klimatik. Sanzman klima i pli gro risk ki nou pei pe fer fas avek. Lerozyon sever, laroul ki aprezan pe kraz lo bann semen lakot e linondasyon pandan tou lede sezon dan lannen in antre ki nou lanvironnman, nou bann resours ekonomik e menm nou

lavi sosyal i reste vilnerab e ki nou bezwen adres sa problem dan en meyer fason.

Labank Mondyal atraver Minister responsab pou Sanzman Klima, pe aktyelman fer en letid pou vwar ki mannyer Sesel i kapab adres lerozyon, linondasyon e risk klimatik lo bann lakot Mahe, Praslin e La Digue. Sa letid 11 mwan pou donn nou en pli bon apersi lo sityasyon, e metod apropriye ki merit ganny aplike dan bann landrwa kot nou ganny plis problem lerozyon dan lepase ;- parey Beau Vallon, Au Cap, Cote D'Or e Anse Kerlan.

Gouvernman pou travay avek sa lorganizasyon pou trouv bann sours finansman, pou ki letan rezilta i pare dan trwazyenm kar lannen, nou kapab tre vit apre lans dan bann travay pou kontrol sa bann problem lerozyon. Antretan 2021, plizyer travay proteksyon lakot par egzant dezyenm faz Amitie in ganny bidzete. E osi annan en travay anba Fon Global pou Adaptasyon e Linyon Eropen ki pou adres drenaz e lerozyon ki'n deza demare lo La Digue.

Gouvernman in osi fer langazman pou ki i kontinyen travay dan 2021, pou amelyor drenaz e anpes linondasyon

dan plizyer kominote parey Anse Aux Pins, Quatre Bornes, Takamaka, La Misère e La Digue.

Sesel pe travay lo en seri target Nasyonal pou lenerzi ek klima ki pli anbisyè ki nou pou enkli proteksyon losean. Sa pou ganny prezante an Novanm kot Konferans Mondyal lo sanzman klima ki pou fer *Glasgow, Lacoste*.

Parey in ganny prezante dan nou manifesto, nou oule ki Sesel i al pli lwen lo prodiksyon lenerzi renouvlab e ki avan 2030, nou arive zwenn e menm depas sa target 15poursan. Dan sa lannen nou pou kontinyen avek program met fotovoltaik lo bann batiman piblik atraver program sipor ki Sesel pe gannye avek Lenn ek *Italy*.

Avek bann gran proze ki pou lanse sa lannen tel parey lenstalasyon en *megawatt* lo zil Romainville, *5megawatt* flotan lo lagon e en proze batri, Sesel alor pou apros 5poursan litalizasyon lenerzi renouvlab. An Zanvyè, Gouvernman osi in siny en nouvo lagreman 30milyon *Yuan* avek Gouvernman Lasin, ki permet zil Curieuse vin 100poursan depandan lo soler. E permet 41 lekòl pou benefisyè avek pan

fotovoltaik e osi azout 800 lalimyer pou semen.

Pou vreman fer progre e depas target 15poursan par lannen 2030, nou pou bezwen travay pros avek *PUC*, pou li zwe son rol fasilitater par kontinyelman investir dan rezo distribisyon e annan plis stokaz lenerzi an servan batri. *PUC* i pou bezwen osi revwar tarif ki i peye pou elektrisite prodwi atraver sours renouvlab, e osi revwar tarif elektrisite ki konsonmater i peye.

Sa bann rev i a osi aplik pou delo e desarz, akòz nou osi bezwen konsider sa de lezot servis e bann pli gran proze ki *PUC* pe antreprann dan sa domenn. Espesyalman proze danm La Gogue e sistenm desarz lo La Digue. An menm tan *PUC* pou bezwen vin pli efikas par redwir son kou loperasyon e elimin gaspiyaz kot i annan.

8.9. Sekter Lanvironnman

Mr Speaker, en Sesel prop i osi primordyal pou nou lasante e byennet sosyal e ekonomik. Alor i tre enportan malgre ki i koute ki nou kontinyen asire ki nou pei i reste prop. Gouvernman pou alor amelyor fasilitate koleksyon salte par

ogmant standar e met plis bin piblik a laporte lepep. E dan sa de lannen ki vini osi kree fasilite pou fer triyaz salte ki enkli bann *sorting bins* lo Praslin e La Digue.

Byento Konsey Minis pou konsider lenplimantasyon nouvo plan zesyon salte pou Sesel. Sa plan i annan bi pou kontinyen investir dan sa domenn. Ogmant partisipasyon piblik dan sa bann program resiklaz e pou met an plas bann stratezi e regilasyon pou asire ki Sekter Prive i zwe en rol pli aktiv dan sa domenn.

Nou krwar ki Sesel i merit tre anbisye lo sa size. Nou bezwen annan nou en sistenm ki kree kondisyon pou bann dimoun dan sekter prive ki enterese pou fer triyaz e resiklaz pou fonksyonnen e fer en profi. Ozordi bann lotel e lezot biznes i merit pe triy e redwir lakantite salte ki zot prodwi. Nou bezwen ralanti e menm aret anmenn sernen kalite salte lo bann *landfill* me nou bezwen adres dan en fason serye, size kontaminasyon lanvironnman koze par salte. E nou bezwen osi tre kler kote nou anvi ete dan fitir e sa i en target vreman anbisye.

Gouvernman pou travay atraver Minister

Lanvironnman, pou asire ki nou fer sa diferans kot i konsern lapropte e salte dan sa 5an devan nou.

9.Promouvwar Loportinite

Mr Speaker, sa Gouvernman ki o pouvwar ozordi i krwar dan promouvwar loportinite pou tou dimoun. I pou pran o serye son rol koman fasilitater dan lekonomi e non pa antre an konpetisyon avek sekter prive. Sa Gouvernman i krwar dan larg lanmen Seselwa.

Ki mon pe dir Mr Speaker, se ki nou pou travay avek nenport ki nou sitwayen ki anmenn en linisyativ biznes ki via devan. Pou fer sir ki nou donn li sa koudmen pou realiz son proze. Pou tro bokou letan nou'n tande kot en Seselwa i prezant en proze, i ganny rezete me apre ou vwar en etranze pe fer sa menm proze.

Sa kalite pratik pou arete anba sa Gouvernman.

(APPLAUSE)

MINISTER NAADIR HASSAN

Tou Seselwa pou ganny menm sans pou realiz zot biznes. Sirtou bann ki anmenn deviz etranze dan pei.

Dan sa letan kot nou pe koz lo transformasyon nou lekonomi, nou loportinite biznes ki vin devan nou, nou pou konsidere. Nou oule ki Seselwa i investir non, pa zis dan bann pti biznes kot sans pou agrandi i minim. Me osi dan bann gran proze ki eksport zot prodwi aletranze.

Mr Speaker, i annan en kantite sa bann kalite loportinite la deor. E nou Gouvernman pou met divan anba lezel nou bann antreprenner.

Zisteman Gouvernman i oule met an plas bann target tre anbisye, pou ki Sesel i vin en pei i depans mwens lo lenportasyon. I pour sa rezon ki nou pe ankouraz tou Seselwa pou *think big* ler zot anvi fer biznes.

Nou'n toultan annan bann prodwi tradisyonnèl ki ozordi lemonn pe rode. Sirtou dan Sekter Farmasetik, tel ki lavenir e kannel. Me nou osi kapab devlop nouvo prodwir. Nou oule ki Seselwa i komans fer bines odela nou lafrontyer.

Nou aprezan annan en Minister ki pou fer sa. Minister Lenvestisman, Lantreprenarya e Lendistri. Se sa Minister ki pou annan sa manda pou fer nou biznesmenn Seselwa *think outside the box*. Desizyon pou ganny pran pou ki letan nou pe

aranz nou lekonomi nou osi profite pou promouvwar en fason travay inovativ ki *family friendly*.

Minister Lafanmir an kolaborasyon avek lezot Minister, pou met an plas diferan program ekonomik ek sosyal a laporte bann fanmir. I pou annan bann diferan program e servis modern ki pou ganny ofer, ki pou pran an kont tou bezwen bann fanmir pou amelyor zot kalite lavi, san ki zot vin depandan lo sistenm.

9.1. Ease of Doing Business

Mr Speaker, lanfaz ki Minister Lenvestisman, Lantreprenarya e Lendistri pou pran, se pou fasilitater lav bann biznes dan i e osi pou travay pou amelyor nou klasman avek Labank Mondyal. Priyorite se pou ki lanrezisteman bann biznes i kapab ganny fer *online*.

Dezyenmman, zefor pou ganny mete pou aste bann pti e mwayen lantrepriz pou agrandi. Lankourazman pou gannyen dan prodiksyon lokal e redwir depandans lo lenportasyon kot i posib.

Sa Minister pou etabli en lankadreman pou siport resers e devlopman e propriyete entelektyel, avek bi pou ogmant kapasite pou eksport dan

larezyon e osi enternasyonal. Ki enportan pou fer agrandi nou ba lekonomi ek sosyal.

Industrial Estate Authority pou travay pli pros avek Minister, pou asire ki bann Polis Gouvernman lo alokasyon later endistriyel i transparan e an ankor avek bann Sekter ki merit ganny priyorite, ki nou lekonomi i bezwen.

IEA i osi annan R10 milyon det an aryeraz ki pa'n ganny kolekte. Lanfaz pou ganny met sa lannen, pou asire ki rezis bann lokater i ganny etabli e bann biznes ki annan aryeraz avek *IEA* i pey son det imedyatman.

9.2 Protez serten lenvestisman zis pour Seselwa

Gouvernman i annan plan pou revwar serten kategori biznes ki zis Seselwa ki pou annan drwa envestir ladan. Nou plan se pou protez biznessmenn Seselwa. An menm tan nou pou asire ki son lenplimantasyon i ganny zere byen. Nou pa oule annan en sityasyon de pwa de mezir ankor. Kategori biznes ki'n rikorde pou zis Seselwa i bezwen reste zis pou Seselwa.

10. Konklizyon

Mr Speaker, pour konklir les mwan dir ki sa Bidze i enn ki met fondasyon pou transformasyon ki nou pei i bezwen. Avan ki nou re konstri sa pei nou bezwen fer sir ki son fondasyon i for. Sa i rezon ki nou Gouvernman pe met en kantite zefor pou asire ki Bidze nou pei i retourn lo en semen soutenab e ki nou det i soi retourn soutenab. Me pou transform sa pei nou osi bezwen en sanzman dan fason ki nou fer keksoz, en sanzman *mindset*.

Mr Speaker, se selman ansanm ki nou pou reisir. Sa i konklizyon ki mon anvi fer avek zot ozordi. E mon pou lans en lapel avek tou Seselwa ki annan son pei a ker pou vin avek nou pou enplimant sa program ki mon'n prezante ozordi.

Byensir mon pa espekte ki tou dimoun pou dakor avek sa ki mon pe propoze, me mon demann omwen en sel keksoz, annou pous dan menm direksyon. Annou met nou pei premye dan sa moman difisil. Annou met nou lekonomi premye, akoz se selman si nou re konstri en lekonomi solid ki nou pou kapab ofer to sa bann servis e bann sipor ki nou anvi donn sa pep.

Annou viz nou lanbisyon ver en pei kot nou pou nepli bezwen koz lo dimoun vilnerab e ki bezwen lasistans sosyal. Annou kree en pei ki prodwi ase larises ki pou permet son pep viv dan dignite e konfor. En pep ki pa depandan antyerman lo Leta. Me en pep ki annan son mwayen ekonomik pou li debout lo li menm. Mr Speaker, sa i pa en rev me i kapab vin en realite pou nou pti pei.

Mr Speaker, pou terminen mon oule remerisi Prezidan Ramkalawan pou son vizyon pou sa pei e son gidans dan sa prose Bidze. Mon osi remerisye bann Koleg Minis pou zot kontribisyon e zot sipor e osi bann Minister, Departman e Lazans pou zot preparasyon sa Bidze. Bann *staff* Minister Finans, Planifikasyon Ekonomik ek Komers pou zot konpetans e dedikasyon dan zot louvraz e pou prodwir sa Bidze. Enkli bann *staff* Trezor e *Accounts* ki pandan sa bann peryod restriksyon in reste an operasyon pou asire ki Bidze i ganny egzekite.

Mon pa'n oubliy bann *staff* Lasanble Nasyonal pou zot korperasyon dan sa prose e osi pli enportan bann Manm Lasanble Nasyonal pou zot sipor kontinyel.

Avek sa Mr Speaker, mon a alor rekomann pou laprouvasyon Lasanble Nasyonal en Bidze R11,013,648,296.00 pour lannen 2021.

(APPLAUSE)

MR SPEAKER

Mersi Minis pou ou ladres e avek sa, repons e deba lo ladres e lo sa *Bill*, pou komanse Vandredi le 19 - 9er.

Mon fer en rapel, *ABC* ki nou pou rankontre bann zofisye Finans dan en demi erdtan pou nou planifye program pour bann deliberasyon lo *Bill*.

Avek sa nou ava *adjourn* ziska Vandredi 9er. Mersi.

(ADJOURNMENT)